

# **Asenka Nye Asetsena Nyiamu Dwumadzi Nwoma**

## **—No Ho Nhwehwemu**

### **AUGUST 3-9**

#### **AKORADZE A OFI NYANKOPON N'ASEM MU | EXODUS 13-14**

#### **“Hom Ngyina Dzinn, Na Hom Nhwe [Jehovah] No Nkwagye”**

w13-E 2/1 4

#### **Moses—Obarimba A ɔwɔ Gyedzi**

Obotum aba no dε aber a Israelmba no dur Epo Memen no ho no, nna Moses nnyim dε Nyankopon rebεpaa kwan ama hɔn wɔ po no mu ma wɔaafa mu akɔ. Naaso, nna Moses wɔ ahotodo koraa wɔ Nyankopon mu dε ɔbeγεs biribi dze abɔ no nkɔrɔfo ho ban. Na dεm ahotodo kor no ara so na nna Moses pε dε no nuanom Israelmba no nyina nya wɔ Jehovah mu. Bible no kā dε: “Moses see ɔman no dε, Mma hom nnsuro, hom ngyina dzinn, na hom nhwe [Jehovah] no nkwagye a ɔrebεyε akyerε hom ndε da yi.” (Exodus 14:13) Aso asem a Moses kāe no tumii hyεs Israelmba no hɔn gyedzi dzen anaa? Nyew, osiande Bible no kā Moses na Israelmba nkaa no nyina ho asem dε: ‘Gyedzi ntsi na wotwaa Epo Memen no dε wɔnam asaase kesεε do.’ (Hebrewfo 11:29) Gyedzi a Moses daa no edzi no, ɔnyue nanko na onyaa do mfaso, mbom obiara so a osuaa biribi fii mu no.

w18.09-E 26 ¶13

#### **ɔye Adze Nyina Do Tumfo Dze, Naaso ɔdwen Afofor Ho**

**Kenkan Exodus 14:19-22.** Twa asem no ho mfonyin hwε. Fa no dε nna ewɔ hɔ bi; wεnyi tua Pharaoh na no dɔm no dε wofi hom ekyir reba, na Epo Memen no so da hom enyim. Afei, Nyankopon keka noho. Ihu dε mununkum dum no ekesi nseraban no n'ekyir, na woesiw Egyptfo no enyim ma wonnha

hwee. Naaso wɔ hom nseraban no mu dze, kan etwa hɔ nyina ehyia kama! Afei ihu dε Moses atsen ne nsa akyerε po no do, ma boka mframa bi a n'ano yε dzen ama po no mu akyε ebien. Iyi ma kwan kεse bi bεda nsu no ntamu. Afei dze ɔwo, w'ebusuafø, w'a-nyεmbowa nye Israelmba a wɔaka no nyina nantsew asaase kesεε a wɔabεda hɔ no do asomdwεe mu ara. Ntsemara, ihun biribi a innhun bi da. Asaase kesεε a wɔnam do no nnyε nwinwinnwin na no do so nnyε atεkyε; mbom no, no do yε kesεε a obiara tum nantsew do kama. Iyi ntsi, hɔn a hɔnho nnyε har no mpo tumii nantseew do a wɔammberε.

w09-E 3/15 7 ¶2-3

#### **Mma Wo Werε Mmfir Jehovah**

Aber a nna Egyptfo no hɔn tseaseanam n'anan etutu ma wonnha dza wɔnyε hɔnho no, nna Israelmba no nyina edu po no n'egya wɔ boka afamu dada. Afei Moses tseen ne nsa wɔ Epo Memen no do. Ntsemara na Jehovah maa nsu a nna no mu akyε ebien wɔ afā na afā no nyina kaa bɔɔ mu. Nsu beberebe a nna wɔayε tsentsenntsen dε fasu no nyinara worae guu Pharaoh na no nsordaafo no do, ma hɔn nyinara memee. Atamfo no mu kor mpo ennya nkwa. Israelmba no faa hɔnho dzii koraa!—Ex. 14:26-28; Nd. 136:13-15.

Dza osii yi ho asem maa aman ahorow a nna woetwa Israelmba ho ehyia no bɔɔ hū. (Ex. 15:14-16) Mfe eduanan ekyir no, Rahab a nna ofi Jericho no kāa kyεε Israel mbanyin bee-nu bi dε: “Hom ho hū atɔ hεn do, . . . Na yεatse mbre Ewuradze sii ma Epo Memen no no nsu wewee wɔ hom enyim, aber a hom fi Egypt firii no.” (Josh. 2:9, 10) Nna dεm aman a wɔsom abosom no mpo werε mmfir kwan a Jehovah faa do gyee no nkɔrɔfo no.

Ntsi ɔda edzi de Israelmba no mpo dze, nna hɔn were nnkefir asem yi ara da.

## Pensapensa Bible Mu

### it-1-E 1117

#### Kwantsenmpɔn, Okwan

Ofi tsetse nyina, nna akwan na akwantsenmpɔn wɔ hɔ. Nna akwan ahorow yi mu bi yε akwan etsitsir a eguadzifo dze hɔn ndzemb̄a fa do, na nna dɛm akwan yi nyina kopue nkurow nye ahenman ahorow a nna ɔwɔ Palestine mantɔw no mu. (Nk 20:17-19; 21:21, 22; 22:5, 21-23; Jos 2:22; Ats 21:19; 1Sa 6:9, 12; 13:17, 18) Dza nna ɔyε kwan tsitsir no da Egypt dze kesi Philistine nkurow Gaza na Ashkelon mu, na ɔdze no nkakrankakra fa etsifi no boka afamu dze n'enyi kyere Megiddo. ɔtoa do fi Hazor, wɔ Galilee Po no n'etsifi afamu dze kopue Damascus. Se obi wɔ Egypt na ɔrokɔ Anohoba Asaase no do a, kwantsia a nna obotum afa do no nye dɛm kwan yi a nna ɔda Philistia no. Naaso Jehovah fi ayamuyie mu dzii Israelmba no enyim nye hɔn kεfaa beebi fofor mbre ɔbeεyε a Philistiafo no rennhaw hɔn na wɔrommbɔ hɔn hū.—Ex 13:17.

### it-1-E 782 ¶2-3

#### Exodus

#### Epo Memen no ne fā hen na Jehovah paa mu ma Israelmba no faa mu no?

ɔse de yεhyε no nsew de wɔ Israelmba no hɔn akwantu ne fā a otsiā ebien mu wɔ Etham "wɔ sar no ano" no, Nyankopɔn hyε Moses de "wɔnsan hɔn ekyir na wɔnkεyer nsera Pi-hahiroth enyim, wɔ . . . po ne nkyεn." Nna dɛm anantsenantsew yi bεma Pharaoh enya adwen de Israelmba no enyi do atan hɔn ma wonnu beebi a wɔmfa. (Ex 13:20; 14:1-3) Abemfo bi a wɔgye to mu de Israelfo no faa el Haj kwan no do no kā de Hebrew nyε a wɔkyerε ase "wɔnsan hɔn ekyir" no nnkyere de "wɔbedan hɔnho" anaa mpo "wɔ-

dze hɔn enyi bεkyerε beebi fofor" kεke, mbom osi do dua de wɔbεsan hɔn ekyir ankasa, tse de mbre obi resan n'ekyir ama oeekwetsir esian bi a ɔwɔ n'enyim no. Abemfo no kā de aber a Israelmba no dur Suez Po no n'etsifi afamu no, wɔsaan hɔn ekyir na wɔfaa Jebel 'Ataqah no boka afamu; dɛm bea yi yε mbepɔw nkotsee, na ɔwɔ Suez Po no n'anee afamu. Se ehwε mbre nna Israelmba no hɔn dodow tse, nye beebi a nna wɔabεhyε a, nna ɔrennyε mberew mma hɔn de awerεfir mu ara wɔbedan hɔnho akεfa Po no n'etsifi afamu ber a nna hɔn atamfo fi etsifi afamu hɔ ara ritsiw hɔn no. Iyi kyere de dɛm aber no, nna Israelmba no hwε hɔn enyim a, po na ɔda hɔ yi; wɔsan hɔn ekyir so a ɔrennyε yie osian Egyptfo a nna wɔtaa hɔn do no ntsi.

Wɔ asomafo no aber do no, nna Jewfo atsetsesem bi foa asem yi do. Naaso ne tsitsir no, mbre Bible no kā asem yi nye dza yeedzi kan akā no hyia, naaso adwen a abemfo piinara kura wɔ asem yi ho no nye dza Bible no kā no nnhyia. (Ex 14:9-16) ɔda edzi de beebi a Israelmba no gyinae dze twaa po no mmbεn Po no n'etsifi koraa (anaa Epo Memen no n'anee), ntsi nna Pharaoh na no dɔm no runntum nnyε de wɔrekεfa po no n'etsifi afamu hɔ kεke na wɔaakɔtweɔn Israelmba no wɔ Po no n'egya ama wɔaatow ahye hɔn do.—Ex 14:22, 23.

## AUGUST 10-16

### AKORADZE A OFI NYANKOPON N'ASEM MU | EXODUS 15-16

#### "Tow Ndwom Kamfo Jehovah"

### w95-E 10/15 11 ¶11

#### Ebenadze Ntsi Na ɔwɔ De Isuro Nokwar Nyankopɔn No Ndε?

Aber a Jehovah sεε Egyptfo nsordaafo dɔm no, ɔmaa n'asomfo kamfoo no na obiara so hun ne dzin. (Joshua 2:9, 10; 4:23, 24) Nyew,

ɔdaa edzi dε Jehovah wɔ tum kyεn Egypt ator enyame no nyinara, osiande hɔn mu kor mpo enntum anngye Egyptfo no. Nna wɔwɔ hɔn abosom, nye nyimpa, nye ahoodzi a hɔn nsordaafø wɔ no mu awerɛhyεmu, naaso hɔn nsa sii famu koraa. (Ndwom 146:3) Ntsi, ɔfata papaapa dε Israelm̄ba no toow ndwom dze kamfoo Nyankopɔn tseasefo no a otum gye n'asomfo no dze kyereε dε cɔwɔ osuro pa ma no!

w95-E 10/15 11-12 ¶15-16

**Ebenadze Ntsi Na ɔwɔ De Isuro Nokwar Nyankopɔn No Nde?**

Se nna yεka Moses ho wɔ hɔ na yeenya hεn tsir edzidzi mu a, nkyε biribi bεka hεn so ma yaatow ndwom dε: “[Jehovah], woana na ɔtse dε ɔwo, wɔ enyame mu? Woana na ɔtse dε ɔwo, krɔnkrɔnyε mu onyimnyamfo, ayεyi mu ɔhoyifo, anwanwadzeyεfo?” (Exodus 15: 11) Ofitsi dεm aber no, nyimpa ahorow pii so atse nka dεmara dze besi ndε. Osomafo John kāa kuw bi a no mufo yε Nyankopɔn n'asomfo anokwafo a wɔdze sunsum ase-ra hɔn no ho asem dε: “Wɔtow Nyankopɔn akowaa Moses ndwom no nye Egumbaa no no ndwom.” Dεm ndwom soronko yi yε ebεn ndwom? “[Jehovah] Nyankopɔn, adze nyina do Tumfo, wo ndwuma yε akese na ɔyε nwan-wa; mbersantsen Hen, w'akwan tsen na ɔyε nokwar. [Jehovah], woana na onnkosuro, na ɔnnkεhyε wo dzin enyimnyam? Na wo nko na eyε krɔnkrɔn.”—Nyikyerε 15:2-4.

Ndε so, nyimpa piinara adze hɔnho efi ator som ho, na nnyε Nyankopɔn ne nsaano ndwuma nko na wɔkyere ho enyisɔ, na mbom hɔn enyi sɔ ne mbrasem ahorow so. Nyimpa a wofi aman pii mu no atwe hɔnho efi wiadze a aporɔw yi ho osiande wɔgye to mu dε Nyankopɔn ne mbrasem na ɔtsen. Ntsi wɔdze dεm mbrasem yi bɔ hɔn bra, na ɔno ama wɔa-dze hɔnho. Nyimpa piinara na wɔtwe hɔnho fi

dεm wiadze a aseε yi ho afe biara, na wɔbε-ka Jehovah n'asomfo a wɔwɔ n'ahyehyεdze a no ho tsew na ɔtsen no ho. ɔnnkεkyεr koraa, Nyankopɔn bεsεε ator som na oeeyi dεm wiadze bɔn yi so efi hɔ, ama n'asomfo aatsena ase daa wɔ wiadze fofor bi a tsenenee tse mu no mu.

**it-2-E 454 ¶1**

**Ndwom**

Wɔ tsetse Israel no, ɔbεyε de nna ndwom ahorow a wɔtow no yε dza se kuw bi tow a, nna kuw fofor so agye do no bi. Anaaso de obotum aba no de nna ɔyε dza ɔbaakofo bi ma do a, nna afofor so agye do no. ɔbεyε de ɔno na wɔfrε no ‘ngyedo’ wɔ Kyerewnsεm no mu no. (Ex 15:21; 1Sa 18:6, 7) Kwan a nna wɔfa do tow ndwom no, dεm pεrεsεr so na wɔakyerew no wɔ ndwom ahorow bi a ɔwɔ Kyerewnsεm no mu no. Iyi ho mfatoho nye dza ɔwɔ Ndewom 136 no. De mbre wɔkāa kuw akεse ebien a wɔtoow ndaase ndwom wɔ Nehemiah n'aber do ho asem, nye dwuma a wodzii aber a nna worubue Jerusalem fasu a wɔtoow no fofor no ano no da no edzi de wɔ-toow ndwom no wɔ dεm kwan yi do.—Ne 12: 31, 38, 40-42.

**it-2-E 698**

**ɔbaa-Nkɔnhyεnyi**

Miriam nye ɔbaa a Bible no dzii kan kāa noho asem de ɔyε ɔbaa-nkɔnhyεnyi. ɔda edzi dε, Nyankopɔn duaa no do dze nkrasem anaa nkrasem ahorow bi too gua. Bi a Nyankopɔn yεε dεm dze nam no sunsum a ɔdze kaa no ma ɔtow ndwom no do. (Ex 15:20, 21) Ntsi, wɔyεε asem bi a ɔno na Aaron kāa kyereε Moses no ho kyerewtohɔ dε: ‘Ana Jehovah nnyε hεn so nnkasae?’ (Nk 12:2) Jehovah narankasa nam nkɔnhyεnyi Micah do kāa de ɔsoma “Moses, Aaron, na Miriam” ma wodzii Israelm̄ba no enyim aber a nna oriyi hɔn efi Egypt no. (Mic 6:4) ɔwɔ mu de Miriam nyaa ho

kwan dε obi a Nyankopɔn dze no dzii dwuma dze nkrasem bi too gua dze, naaso nna ɔnye Nyankopɔn ntamu ebusuabɔ no nntse dε ebusuabɔ a nna ɔda no nua Moses na Nyankopɔn ntamu no. Aber a oennhu kwan pa a ɔwɔ dε ɔfa do ye n'adze no, Nyankopɔn twee n'aso yayaayaw.—Nk 12:1-15.

## Pensapensa Bible Mu

w11-E 9/1 14

Ana Inyim?

**Ebenadze ntsi na Nyankopɔn dze nkokɔhwerew maa Israelmba no dε edziban wɔ sar no do?**

Aber a Israelmba no fii Egypt no, mpɛn ebien na Nyankopɔn dze nkokɔhwerew beberebe bi maa hɔn dε nam.—Exodus 16:13; Nkanee 11:31.

Nkokɔhwerew nnye nnoma a wɔsɔso biara. Hɔn tsentsen ye bεye *inches* 7 (sentsimita 18), na hɔn mu dur ye bεye *grams* 100. Wɔnnye na wɔ mbea ahorow pii a ɔwɔ Asia n'anee na Europe. Wɔyε nnoma a wotutu kwan, ntsi se awɔw ba a, wotu kɔ North Africa na Arabia. Odu ber a wɔdze tu kwan no a, piinara bogu mpoano wɔ Mediterranean Po no boka, na wotu fa Sinai Peninsula no do.

Dε mbre *The New Westminster Dictionary of the Bible* kyere no, nkokɔhwerew “tu ntsemtsɛm na wɔyε ma ɔyε few. Wɔhwe mbre mframa no robɔ na wɔdze tu; naaso se mframa no sesa beezi a n'enyi kyere no, anaa nnoma no twa kwan tsentsen na wɔbre a, hɔn nyina bɔhwehwe famu preko pe. ɔba no dεm a hɔn enyi do kyin hɔn.” Ansaana wobotum atoa hɔn akwantu no do no, ɔse dε wɔgye hɔn ahom bεye da kor anaa nda ebien bi, ntsi ɔma ɔyε mberew ma nyimpa anaa mbowa afofor dε wɔbεkyer hɔn. Wɔ mfeha a otsia 20 n'ahyεse no, nna Egypt dze nkokɔhwerew bεye ɔpepem ebiasa kɔ aman afofor do kɔtɔn dε edziban afe biara.

Mpɛn ebien a Israelmba dzii nkokɔhwerew no nyina no, nna ɔyε bεye April bosoom no mu hɔ beezi. ɔwɔ mu dε nkokɔhwerew taa tu fa Sinai no mpotamu wɔ dεm aber no mu dze, naaso ɔyε Jehovah na ɔmaa ‘mframa bi bɔɔ’ dεm nnoma yi dze kɔr Israelmba no nseraban no mu.—Nkanee 11:31.

w06-E 1/15 31

**Nsɛm A Akenkamfo Bisa**

Aber a wɔgyee Israelmba no fii nkowaasom mu no, annkyer koraa na wɔhyεs ase dε wɔruhwinhwin wɔ edziban ho. Ntsi Jehovah tɔr manna maa hɔn. (Exodus 12:17, 18; 16:1-5) Dεm aber no, Moses kāa kyere Aaron dε: “Fa kutu bi, na fa *manna omer* kor gu mu, na fa si Ewuradze enyim, ma wɔmfā nsie hom ebusuasantsen.” Bible no kā dε: “Dε mbre Ewruadze hyεs Moses no, dεmara so na Aaron dze sii Adansehyɛdze [adaka bi a nna wɔdze kora nkrataa a no ho hia do] no enyim, ma wɔdze eesie.” (Exodus 16:33, 34) ɔyε nokwar dε Aaron boaboa manna no bi ano guu kutu bi mu dεm aber no dze, naaso se nna obotum dze ekesi Adansehyɛdze no enyim a, nna ɔse dε ɔtweɔn kesi dε Moses bεye Adaka no ewie na ɔdze abopon no egu mu ana.

## AUGUST 17-23

**AKORADZE A OFI NYANKOPɔN N'ASEM MU | EXODUS 17-18**

**“Hɔn A Wonyim Dza Hɔn Ahoodzi Botum Ayε No Tsetse Afofor, Na Wɔdze Dwumadzi Hyεhyε Hɔn Nsa”**

w13-E 2/1 6

**Moses—ɔbarimba A ɔwɔ Dɔ**

Moses daa no edzi dε ɔdɔ no nuanom Israelfo no. Israelmba no bohun dε Jehovah nam no do rekyer hɔn kwan, ntsi nna ɔyε a wɔdze

hōn haw ahorow bōto Moses n'enyim. Bible no kā dē: “Oman no gyinaa Moses do tsenten fi anapa kodur ewimbir.” (Exodus 18: 13-16) Osiandē nna Moses dze ndōnhwer pii tsie Israelmba no hōn haw ntsi, ɔfonae ara yie! Naaso ne nyina ekyir no, nna n'enyi gye dē ɔroboa nyimpa a ɔdō hōn no.

### w03-E 11/1 6 ¶1

#### Ema Wo Nuanom Nya Wo Mu Gyedzi A, ɔdze Enyigye Ba

Iyinom ye mbarimba a wōdaa no edzi dē wōcwā suban pa ansaana wōrepaw hōn dze dwumadzi ahorow bi ahyehye hōn nsa. Nna woedzi kan ada no edzi dē wosuro Nyankopōn; nna wōcwā osuro pa ma ɔbōadze no, na nna wosuro dē wōbeyē biribi a ɔmmpe. ɔda edzi dē nna obiara nyim hōn dē wōcye mbarimba a wōreyē dza wobotum biara ama hōn abrabō nye Nyankopōn ne gyinapē ahorow eehyia. Nna wokyir nsisi biara; iyi maa ɔdaa edzi dē hōn abrabō ho tsew wō Nyankopōn enyim ma ntsi wōremmfa tum a woonya no nndzi dwuma wō kwan bōn do. Nna wōremmfa ho kwan a woonya osian ahotodo a afofor enya wō hōn mu no mmpē mfaso mma hōnho, hōn ebusuafō anaa hōn anyenkofo.

### w02-E 5/15 25 ¶5

#### Atseneneefo Ma Nokwardzi Kyere Hōn Kwan

Nna Moses so brē noho adze, na nna onyim dza n'ahoodzen botum aye. Aber a nna ɔrofona osian Israelmba no hōn ehiadze a nna oridzi ho dwuma no ntsi, n'asew Jethro maa no afotu bi a nna ɔbōboa no. ɔkāa kyere no dē ɔnhwehwē mbarimba bi a wōfata na ɔmfā dwumadzi no bi nhyeheyē hōn nsa. Osiandē Moses gyee too mu dē nnyē biribiara na obo-tum aye ntsi, otsiee afotu no guu asopa mu na ɔdze yee edwuma. (Exodus 18:17-26; Nkanee 12:3) Nyimpa a onyim dē nnyē biribiara na obo-tum aye no nntwentweon n'anadanadze

dē ɔdze dwumadzi ahorow bēhyehye afofor nsa, na dēmara so na onnyi adwen bi dē sē ɔdze dwumadzi ahorow hyehye afofor a wōfata nsa a, wō kwan bi do no ɔbēma ho kwan a ɔcwā no do atseg. (Nkanee 11:16, 17, 26-29) Mbom no noho per no dē ɔbōboa hōn a wōtse dēm no ma woeenya nkēnyim wō Nyankopōn no som mu. (1 Timothy 4:15) Aso ɔnnye dēmara na ɔse de hēn mu biara ye anaa?

### Pensapēnsa Bible Mu

#### w16.09-E 6 ¶14

#### “Mma W'abaw Mu Nntu”

Aber bi a nna Israelmba no wō akono no, Aaron na Hur suoo Moses ne nsa mu araa kesii dē ɔkō no baa ewiei. Wō hēn afamu so, yebotum ahwehwē akwan ahorow bi a yebotum afa do dze aye afofor mboa. Woananom na yebotum aboa hōn? Binom nye hōn a mpaniyinye anaa yarba retseetsee hōn, hōn a hōn ebusuafō retaa hōn, hōn a wōcye ankonam, nye hōn a wōahwer hōn adōfo. Yebotum so ahyē mbabun nye mbofra a worihyia nhyeđo ahorow no nkuran; tse dē hōn a afofor rehyē hōn dē wōnkō skuul nkō ekyir, wōmper nnya sika pii anaa wōnhwehwē edwuma papa bi nyē ama “woeedzi yie” wō asetsena mu no. (1 Thess. 3:1-3; 5:11, 14) Sē ewō Ahendzi Asa do, enam aṣenka mu, enye afofor roto nsa edzidzi, anaa sē enye afofor ridzi nkōmbo wō fon do a, hwehwē akwan ahorow a ibotum afa do ada no edzi dē edwen nyimpa ahorow a wōtse dēm no ho ankasa.

### it-1-E 406

#### Esusudze, Gyinapēn

Ekyingye biara nnyi ho dē, kyerewtohō a Moses yee no nyina fi Nyankopōn hō. ɔyē nokwar som ho akwankyerē na esusudze a ɔfata, na nsem a ɔcwā mu no dzi iyi ho adanse kofee. ɔnnye Moses noara na ɔhyēe noho bēyēe Israelman no hōn kandzifo nye hōn

panyin. Ahyese no mpo a nna Jehovah dze ho kwan no rema no no, ɔtwetwee noho kakra. (Ex 3:10, 11; 4:10-14) Mbom no, ɔyε Nyankopɔn nankasa na ɔdze dɛm dzibew yi maa Moses na ɔmaa ɔyεes anwanwadze ahorow wɔ Egypt. Iyi maa Pharaoh no nkongyaayifo no mpo gyee too mu dε Nyankopɔn na ɔsoma Moses ampa. (Ex 4:1-9; 8:16-19) Ntsi nna ɔnnyε Moses noara ne pε dε ɔbεba abεye ɔka-safo a noho akokwaa nye ɔkyerεwfo. Mbom no, osian setsie a Moses yεe maa Nyankopɔn n'ahyεdze ntsi, sunsum krɔnkrɔn no pusuuw no ma ɔkasae, na ekyir yi ɔcaa no ma ɔkyerεw nsεm ahorow bi a ɔka gyinapεn anaa esusudze a ɔwɔ Bible mu no ho.—Ex 17:14.

## AUGUST 24-30

### AKORADZE A OFI NYANKOPɔN N'ASΕM MU | EXODUS 19-20

#### “Mbrε Mbransεm Du No Fa Woho”

w89-E 11/15 6 ¶1

#### Mbransεm Du No Kyerε Ebεnadze Ma Wo?

Mbransεm du no mu anan a odzi kan no ma yehu dza Jehovah hwehwε fi hεn hɔ. (**Odzi Kan**) ɔyε Nyankopɔn a ɔda ho ara hwehwε dε yεsom nankotsee. (Matthew 4:10) (**Otsia Ebien**) ɔnnse de n'asomfo no mu bia-ra dze ehonyi dzi dwuma wɔ hɔn som mu. (1 John 5:21) (**Otsia Ebiasa**) ɔse de yεdze Nyankopɔn ne dzin no dzi dwuma wɔ kwan a enyidzi wɔ mu na ɔfata do; ɔnnse de yε-dze dzi dwuma wɔ kwan bi do a ɔbεkyεrε dε yemmbu no. (John 17:26; Romefo 10:13) (**Otsia Anan**) ɔse de yεbɔ hεn bra ma ɔnyε Nyankopɔn ne gyinapεn nye ne pε hyia. Iyi bɔbooa hεn ma ‘yaagye hεn ahom’ anaa yaat-twe hεnho efi abrabɔ biara a ɔbεkyεrε dε gyama yεye atseneneefo dodoodow no ho. —Hebrewfo 4:9, 10.

w89-E 11/15 6 ¶2-3

#### Mbransεm Du No Kyerε Ebεnadze Ma Wo?

(**Otsia Enum**) Setsie a mba bεyε ama hɔn awofo no da ho ara yε adze tsitsir a ɔma koryε tsena ebusua no mu, na ɔdze Jehovah ne nhylira ba. Na hwε enyidado soronko bi a “mbra a odzi kan a anohoba ka ho” yi ma inya; ɔnnyε dε ɔbεma ‘ewie yie’ kεkε o, mbom ɔbesan so ama “eenyin akyεr asaase do.” (Ephesusfo 6:1-3) Osiande yεtse wiadze nhylhyεs bɔn yi ne “nda a odzi ekyir” mu ntsi, setsie a ɔtse dεm a mba bεyε no bεma woenya enyidado dε daakye worunnwu bio. —2 Timothy 3:1; John 11:26.

Sε yεdɔ hεn nyεnko a, yεrennyε ndzembə bɔn ahorow a odzidzi do yi mu biara mmfa mmpira no; (**Otsia Esia**) yerinndzi ewu, (**Otsia Esuon**) yεronntɔ awar, (**Otsia Awɔ-twe**) yerunnwia adze, na (**Otsia Akron**) yεrenngye hεn nyεnko bi ho dasewia. (1 John 3:10-12; Hebrewfo 13:4; Ephesusfo 4:28; Matthew 5:37; Mbεbusεm 6:16-19) Na hεn nsusui so ε? Mbrasεm (**Otsia Du**) a ɔkasa tsia enyiber no kaa hεn dε Jehovah hwehwε dε yεbεma hεn nsusui ho atsew da biara da wɔ n'enyi do.—Mbεbusεm 21:2.

#### Pensapεnsa Bible Mu

it-2-E 687 ¶1-2

#### ɔsɔfo

**Christianfo Asɔfodzi No.** Nna Jehovah edzi kan ahyε Israelfo no bɔ dε sε wosie n'a-hyεmu a, wɔbεba abεye “asɔfo ahendzi, nye ɔman krɔnkrɔn” ama no. (Ex 19:6) Nna Aaron asɔfodzi no yε asɔfodzi kεse bi a ɔbεba no no sunsuma; ntsi nna ɔse de Aaron asɔfodzi no kɔ do yε edwuma kesi dε asɔfodzi kεse no bεba na wɔaahyε ase aye edwuma. (Heb 8: 4, 5) Nna Aaron asɔfodzi no bɔkɔ do aye edwuma araa ekεsi dε Mbra ahyεmu no bɔbɔ adze, na ahyεmu fofor no ahyε ase aye edwu-

ma. (Heb 7:11-14; 8:6, 7, 13) Ahyεse no dze, nna Israelmba no nkotsee nye nkɔrɔfo a nna wobotum enya ho kwan abεye Jehovah n'asɔ-fo a nna wɔbɔsom wɔ n'Ahendzi a nna ɔahyε ho bɔ no mu; naaso ekyir yi, Jehovah tserεw mu ma Amanaman mufo so nsa kaa ho kwan yi bi.—Adw 10:34, 35; 15:14; Ro 10:21.

Jewfo kakraabi pε na wɔgyee Jesus too mu de ɔno nye Christ no. Ntsi, nna asɔfo ahendzi **ankasa** nye ɔman krɔnkrɔn no mufo no nyina nnyε Israelmba. (Ro 11:7, 20) Osiandε Israel enndzi Nyankopɔn nokwar ntsi, Nyankopɔn nam no nkɔnhyεnyi Hosea do dzii kan bɔɔ Israel kɔkɔ de: "Osiandε apow nyimdzee ntsi, mo so mobɔpow wo, de ennda ho nndzi mo sɔfɔe: wo were efir wo Nyankopɔn ne mbra ntsi, mo so mo were befir wo mba." (Ho 4:6) Jesus kāa asɛm a ɔtse dɛmara so kyεreε Jewfo mpanyimfo no de: "Nyankopɔn Ahemman no, wɔbεgye efi hom nsamu dze akεma ɔman a wɔdze mu eduaba beba." (Mt 21:43) Naaso aber a nna Jesus Christ wɔ asaase do no, osiandε nna ɔda ho ara hyε Mbra no ase ntsi, ɔgyee too mu de Aaron asɔfodzi no da ho ara yε edwuma. Ntsi se nna ɔsa akwatafo yarba a, ɔma wɔkɔ asɔfo a nna wɔwɔ hɔ dem aber no hɔ na wɔdze afɔrbɔdze a ɔfata biara kεma hɔn, de mbrε nna wɔhwehwε fi hɔn hɔ. —Mt 8:4; Mr 1:44; Lu 17:14.

#### w04-E 3/15 27 ¶1

Exodus Nwoma No Mu Nsɛntsitsir

**20:5—Ebεn kwan do na Jehovah dze 'egyanom hɔn emumuyε ho asotwe' ba ebusuasantsen a wɔbεba daakye no do?** Se nyimpa biara nyin du beebi a onyim papa nye bɔn a, nyimpa no noara ne nyεe nye no suban do na wogyna bu no atsεn. Naaso aber a Israelman no hyεe ase de wɔrosɔr abosom no, ebusuasantsen a wodzii ekyir bae no nyina so nyaa no do nsunsuando bɔn no bi. Osiandε nna ɔman no awaa efi nokwar

som ho ntsi, ɔmaa ɔyεs dzen maa hɔn mu binom mpo a nna wodzi nokwar no de wɔbɔkɔ do ekura hɔn emudzi mu.

## AUGUST 31-SEPTEMBER 6

**AKORADZE A OFI NYANKOPɔN N'ASEM MU | EXODUS 21-22**

**"Nya Adwen A Jehovah Wɔ Wɔ Nkwa Ho No Bi"**

**it-1-E 271**

ɔhwe

Se nna Hebrewnyi bi wɔ akowaa anaa afonabaa bi na se ɔye asoɔdzen anaa ɔtsew etū a, nna owura no wɔ ho kwan de ɔdze abaa hwe no. Naaso ɔkεba no de aber a owura no rohwe no no, akowaa anaa afonabaa no fa mu wu a, nna ɔse de wɔtwe owura no n'aso. Naaso, se da kor anaa nda ebien bi twa mu wɔ ɔhwe no ekyir, na akowaa anaa afonabaa no wu a, ɔnɔdze nna no wura no ho sɔnn; osiandε ɔno bεma ɔada edzi de nna owura no nnyi n'akowaa anaa n'afonabaa no ho adwen biara de onya no a oboku no. Owura no wɔ ho kwan biara de ɔdze ntsεa a ɔse na ɔfata ma, osiandε akowaa no ye "ne sika." ɔnntaa nnsi de obi bεgye enyim ara de ɔresεe n'egyapadze bi a ɔsom bo ma no papaapa no ma oeefi ne nsa. Afei so, se nna akowaa anaa afonabaa no wu da kor anaa nda ebien ekyir a, nna ɔbεye dzen papaapa de wobotum akyere de ɔye ɔhwe a no wura no hwee no no na ama oewu anaa biribi fofor na akεfa owu no aba. Ntsi nna se akowaa anaa afonabaa no tsena nkwa mu da kor anaa nda ebien bi a, nna wɔronntwe no wura no n'aso.—Ex 21:20, 21.

#### Ivs-E 95 ¶16

**Aso Ibu Nkwa De Mbrε Nyankopɔn Bu No No?**

Nyimpa biara no nkwa som bo ma Jehovah. Abofra a ɔhyε ne nā ne yamu mpo no nkwa som bo ma no papaapa. Wɔ Moses Mbra no

mu no, se nna obi annhye da ara mpo na opira ɔpemfo bi ma ɔpemfo no **anaa** ne ba no wu a, nna Jehovah bu dem nyimpa no de oedzi ewu. Iyi kyerɛ de ɔmmfa ho de nyimpa no annhye da ara na ɔmaa esian a ɔtse dem sii no, nna woekum obi, ntsi otwar de wɔdze nkwa hye nkwa a wɔahwer no ananmu. (**Kenkan Exodus 21:22, 23.**) Wɔ Nyankopɔn enyi do no, obu abofra a wɔnnwoo no no mpo de ɔye nyimpa a ɔtse nkwa mu. Se dem na asem no tse dze a, nna ɔno ehwe a, Nyankopɔn bu nyinsen a woyi gu no den? Se ohu mbofra ɔpepem pii a woyi hɔn gu afe biara no a, ehwe a ɔtse nka den?

#### w10-E 4/15 29 ¶4

#### Jehovah Pe De Inya Asomdwēe Na Ahoto

Se nna anyembowa bi ma obi pira a, nna wɔdze asotwe a ɔwɔ Mb̄ra no mu no so ye edwuma. Se nantwi bi pem obi ma nyimpa no wu a, nna otwar de no wura no ku abowa no amma abowa no ammpem obiara bio. Osian-de nna owura no runntum nndzi abowa a oeku no ne nam anaa orunntum nntɔn mma afofor ntsi, nna iyi bɛma ɔahwer adze kese. Naaso fa no de aber a nantwi bi piraa obi no, no wura no ammontan abowa no wɔ fie. Se ɔba no dem a, wɔbeyɛ no den? Se ɔkeba no de ekyir yi dem nantwi kor no ara koku obi a, nna ɔse de woku nantwi no **na no wura no** nyina. Dem mb̄ra no maa obiara a nna ɔwɔ ayembowa no hun de, ɔnnsɛ de ogyaa no mb̄owa no ma wɔnenam basabasa.—Ex. 21:28, 29.

#### Pensapensa Bible Mu

#### w10-E 1/15 4 ¶4-5

#### Ebenadze Ntsi Na ɔse De Ihyira Woho Do Ma Jehovah?

Christianfo ahodohyira ye enyibersɛm. ɔkɔ ekyir sen de obi bɛhye bɔ bi keke. Naaso se yehyira hɛnho do ma Jehovah a, eben

mfaso na yenya? ɔwodze yenyɛ dem ntotoho yi. Wɔ adasamba afamu no, se obi na obi wɔ ebusuabɔ bi, na wɔhyehye hɔnho bɔ a, eben mfaso na wonya? ɔwodze yemfa anyenkofa de nhwedo. Se ibotum enya anyenkofa bi do mfaso a, ɔse de egye no ho asodzi ahorow no so to mu. Iyi bɔhwehwɛ de ebɛgye ato mu de ɔye w'asodzii de ebɛkyere de edwen wo nyenko no ho. Anyenkofa bi a ɔda nsew a wɔakā ho asem wɔ Bible mu no mu kor nye anyenkofa a nna ɔda David na Jonathan hɔn ntamu no. Wɔ hɔn anyenkofa no mu no, wɔnye hɔnho yee ahyemu mpo. (**Kenkan 1 Samuel 17:57; 18:1, 3.**) ɔwɔ mu de anyenkofa a ɔtse dem ho ye na dze, naaso se anyenkofo dzi hɔnho nokwar na hɔn mu biara dzi n'asodzii ho dwuma de mbre ɔse a, mpɛn pii no, ɔma anyenkofa no mu ye dzen.—Mbe. 17:17; 18:24.

Wɔ mb̄ra a Nyankopɔn dze maa Israelmba no mu no, ɔkā anyenkofa fofor bi a se obi nye obi ye a wonya do mfaso no ho asem. Se nna akowaa bi no wura nye no dzi no yie na akowaa no pe de ɔkɔ do nye no wura no tsena afebɔɔ a, nna akowaa no botum nye no wura no aye nhyehyeɛ bi a ɔbɛma ɔasom no no nkwa nda nyina. Mb̄ra no kā de: “Na se akowaa no kā no petee de, Modɔ mo wura, me yer, nye me mba; mennkɛfa moho edzi akɔ a: ɔno no wura no mfa no mb̄ra Nyankopɔn enyim, na ɔmfa no mb̄ra ɔpon ho, anaa ɔpon dua ho; na no wura no mfa fitsii mfitsi n'asomu; na ɔnsom no daa.”—Ex. 21:5, 6.

#### it-1-E 1143

#### Mmbɛn

Asem a ɔwɔ Exodus 21:14 no botum akyerɛ de se ɔɔɔfo mpo ku obi a, nna ɔse de woku no bi hye ananmu, anaade se obi hye da ara ku nyimpa na okosuo afɔrmbukyia no ne mmbɛn mu mpo a, nna ɔse de woku ɔno so.—Fa toto 1Ah 2:28-34 ho.